

# Baselgia barocca, La Punt

La baselgia da La Punt ho tuot ün oter caracter cu la baselgia San Andrea. Pervi da sieu tuor originela sur il cor cun la chaplina in fuorma da tschiguolla vain ella suvenz numneda «baselgina tirolaisa». La baselgia barocca dal 1680 es – per relaziuns engiadinaisas - decoreda in abundanza dadains e dadour; ella as rechatta in ün stret spazi traunter duos chesas signurilas. Tenor ün'inscripziun tal cor es la baselgia gnida dannageda ligermaing l'an 1799 tar cumbats traunter Frances ed Austriacs.

Cun entrar da la via illa cuort pittoresca da la baselgia do specielmaing in ögl la fatscheda barocca da culur chi'd es fermamaing structureda. Pilasters da paraid cun capitels toscans, trevs marmoredas in möd originel e volutas onduledas (in fuorma da spirala vi dal capitel da las culuonnas ionicas) daun a la fatscheda ün'apparentscha nöbla.

Eir l'intern fo ster stut scha's guarda pü precis. L'abundanza da detagls es insolita per üna baselgia refurmeda. Pilasters cun capitels ionisands domineschan la nev chi nun es quadrata, dimpersè octangulera. Ils vouts da la nev e dal cor sun ornos cun medagliuns da stuc pittüros. l'ls rampchins d'acantus da las trevs as vezza quindesch choïns d'aungel. Ün inter cor d'aungels chaunta dimena insembel cun la raspeda.